

欽定剿平粵匪方略

欽定勦平粵匪方略卷一百六十三 丙辰年

十月初一日 乙酉 福濟鄭魁士奏言連日水陸賊

援米逾鉅萬一由裕溪窺伺東關一由神塘河  
滋擾無爲巢城之賊尙有數萬巢湖中礮船快  
槳船不時駛出 臣等巢南巢北行營共計兵勇  
止五千餘名無爲新復之區經知府李元華募  
勇數千分投堵禦東關爲水陸要隘都司莫青

雲等帶勇固守廬江城內參將滕仲武僅帶兵  
五百名彈壓在在俱形單弱秦定三自桐來函  
屢言賊衆兵單臣等亦無可抽撥安慶太湖潛  
山望江宿松和州之民日望大兵拯救儻巢城  
克復後統兵前進巢無皆鮮重兵賊一乘虛前  
功盡棄臣晝夜焦思非厚集兵力實鮮良圖且  
以南北大局論之能乘楊秀青新死賊中內亂

激勵諸軍直擣江甯復省垣而擒逆首此上策也巢湖爲出米之區平日商船雲集如果皖軍得手乘勝南征必先取蕪湖東西梁山分兵駐守吳全美等再督帶紅單各船往來江面南北兩軍隨時策應然後臣等率陸兵直攻南面曾國藩統水師扼守小孤山此中策也攻東應東擊西應西羣盜如毛不遑勦辦自用兵以來何

嘗不攻克城垣殲除巨惡而迄無就緒者不能  
得其要領賊逸我勞賊先我應此下策也上策  
不易爲中策盡心力而爲之猶未爲晚但所部  
之軍萬難分布與其經年累月籌防迄無成功  
何如裕餉增兵勦賊速期竣事惟有請

旨迅撥青州滿營兵五百名兗州鎮標兵五百名直隸  
兵一千名察哈爾馬隊一千名令其星速來巢

聽候調遣並將吳全美等水師准臣等隨時調遣以扼江北而控中權皖民幸甚大局幸甚奏  
八

上命軍機大臣傳諭崇恩曰福濟等奏皖省水陸援賊甚多巢縣之賊尙有數萬請飭調山東青州滿營兵五百名兗州鎮標兵五百名前往助勦著崇恩察看情形能否於青兗二處如數撥往或酌抽精銳數百

名遴員管帶並整辦軍裝器械飛速起程交福濟等  
調遣毋稍延誤

上又命軍機大臣傳諭英桂曰據福濟奏水陸賊援由  
裕溪神塘河窺伺東關滋擾無爲巢城之賊尙有數  
萬請調察哈爾馬隊赴巢聽候調遣著英桂於察哈  
爾官兵到後酌撥五六百名傳旨令穆騰阿管帶迅  
赴皖省以資攻剿

初三日

丁亥

怡良奏言旬容逆匪於我兵紮營張

家莊後添築東南城外營盤死守九月初六日

鎮臣張國樑派遊擊劉季三等分攻各門三路

齊進劉季三等正攻北門遊擊戴文英等直進

東門外關廂街上斃匪多名追至近城關橋方

欲奪橋而過該逆忽於南門添出大股包抄我

兵少卻副將吉達等飛往援應張國樑裹創馳



往手斬退縮兵勇三名遊擊李春寅等會同吉連兩路夾擊張國樑親督各軍從旁抄勦逆衆竄回而北門山梁之賊膽敢乘勢壓下劉季三等復督勇衝殺斬獲甚多該逆始退回城十一日我軍移營至離城三里地方該逆屢次出撲均經我軍擊退十四五等日逆匪大股分路撲來並先於吉利村伏賊接應張國樑親督參將

李若珠等馳往迎擊斃賊甚多而我軍將弁亦多受槍傷仍復奮勇鏖戰該逆又於東北兩門各出千餘人撲我營盤經副將王浚等擊退復出賊二三千人分股猛撲另由南門出賊三四千人又有馬步賊四五千分作六股繞過都司陶茂森營後勢甚兇悍明安泰卽派遊擊李春寅等分路迎勦未能得手張國樑親督兵勇

並分軍衝擊斃賊不計其數追至吉利村伏賊  
暗施槍礮我軍受傷多人各兵憤極分隊包抄  
當將伏賊擒斬百餘名餘賊拌死奔回此攻剿  
勾容逆匪之情形也傳振邦進紮蒲塘後親督  
官軍直抵溧水縣城濠邊奮力仰攻並製備攻  
城器具一面移營進紮中山該逆分股來撲參  
將李定太首先衝入賊隊立斬黃衣賊目一名

虎嵩林督兵抄襲斃賊無算該逆猶敢分股出  
撲復經遊擊虎坤元等兵勇擊回斬馘多名各  
軍分路進攻搶過城濠毀賊城上望樓賊仍放  
槍礮死拒並出賊千餘人抄襲我軍經虎坤元  
等截擊斃賊無數傅振邦督兵追勦直抵城根  
該逆閉門死守其分股抄襲我軍之賊千餘人  
殲除殆盡此溧水勦匪之情形也查句容溧水

二城該逆占踞與江甯勢成犄角現經張國樑  
與傅振邦等兩路進攻挫其兇鋒亟應乘此銳  
氣激勵兵勇迅圖克復

怡良又奏言查僞北王韋逆由丹陽敗回金陵  
楊逆閉門不納逆首洪秀泉開門放進因此起  
釁互相戕殺又楊逆向洪逆索取僞印意圖并  
吞洪逆將韋逆調回殺死楊逆及其親屬僞易

工石達開聞信趕回與韋逆又起爭端石逆逃  
赴上江糾集黨與欲圖報復所聞不一而其內  
亂則不爲無因惟韋石二逆尙各擁衆數萬分  
踞各城負隅死守我若徑擣金陵該逆必合而  
爲一是以臣等仍攻句容溧水期在必克先翦  
其枝葉以杜內犯張國樑現派精細聞諜溷入  
賊中設法離閒散其黨與奏入

上命軍機大臣傳諭和春張國樑怡良曰逆匪占踞句容溧水張國樑傅振邦連日攻勦斬獲甚多惟因該逆死守未能卽時克復和春現已接受欽差大臣關防卽可乘銳進勦怡良仍回常州駐紮以防後路現在洪逆殺死楊逆雖探報情形不一而賊匪內亂當屬可信怡良等先攻句容溧水所見甚合機宜張國樑派謀離間和春等一面攻克兩城偵探金陵消息

如有可乘之機卽行馳奏此次溧水斬獲較多句容  
雖獲勝仗而我軍亦多受傷想該逆精銳盡在句容  
如能克復此城盡殲醜類則兇燄漸消和春等務當  
乘此機會與江北德興阿等聯絡一氣迅奏膚公朕  
不勝盼望

怡良又奏言鎮城逆匪於九月初七日經提臣  
余萬清密飭遊擊王夢熊帶兵潛往北門城根



相機穴城未經得手十一日余萬清督率各營  
出隊先飭副將站住等分路埋伏派外委熊定  
邦等前往虎頭山一帶誘敵該逆突出三千餘  
人分股撲來熊定邦等引至設伏處所站住吳  
世斌等齊起包抄前後衝擊斃匪多名該逆狂  
奔另股賊匪復由南門沿河衝出欲襲我軍後  
路遊擊田宗揚等突出截擊殺斃多名適署丹

聞

徒縣知縣吳謙吉督帶民團前來助戰賊衆奔潰我兵乘勝追殺斃賊三百餘名陣斬手執黃旗悍賊一名逆始敗退我兵直抵濠邊仰攻逾時始行撤隊臣仍催余萬清激勵兵勇迅速攻克奏入報

同日

上諭內閣曰西安將軍福興著馳赴江西會同曾國藩  
文俊辦理軍務其所署江甯將軍著和春署理

初六日庚寅署江甯將軍江南提督和春奏言江

南賊勢經官兵節次痛剿東壩克復金壇解圍  
丹陽之賊被剿退至句容該處係金陵咽喉最  
爲扼要溧水地居衝途均須趕緊攻克方可直  
抵江甯臣擬帶兵先往句容督剿以冀迅速成

功現聞各首逆在金陵城內自相殘殺誠爲難  
得之機一俟句容溧水得手卽應進兵金陵察  
看情形或分兵前往鎮江助勦及早克復去其  
犄角則金陵賊勢自孤再行合圍可期次第肅  
清奏入報

同日正白旗漢軍副都統德興阿詹事府詹事

翁同書奏言江浦毗連皖省和州烏江等處賊黨往來援應近又添賊守城九月十三日總兵多隆武羅玉斌等自六合浦口各帶官兵設伏分路進攻賊亦分股迎拒我軍佯退伺其近前突向轟擊賊匪紛紛敗走伏兵齊起截殺百餘名其南面洲地援賊亦經副都統穆克登額槍斃十餘名餘匪避入城中據獲賊供稱賊首僞

檢點黃姓已中礮殞命瓜州踞賊疊經我兵誘  
戰閉壁益堅聞逆衆已成內訌臣等又設間散  
其黨與連日多有自拔來歸者和春於十八日  
抵揚臣等因與密議南北勦辦事宜次日卽行  
起程嗣後仍當隨時函商和衷共濟奏入

上諭曰汝等與和春務必事事和衷勿分彼此以期迅  
殄妖氛瓜州逆匪旣自相殘殺時不可失散黨與行

離間皆屬要著

德興阿翁同書又奏言臣等前奉

諭旨托明阿呈報患病著賞假在營調理托明阿數月以來多方醫治因年逾七十衰病交侵又兼肝氣上衝觸動舊傷作痛未能就痊曾經兩次呈述病狀懇爲奏請回旗調治臣等見其病體支離非寬假時日難冀有瘳可否懇

恩准其回旗調治奏入

上從之

同日官文胡林翼奏言武漢軍餉竭蹶萬分山西陝西四川三省合計本年少解二三十萬兩兵勇口糧積欠八九十日百日不等因憊情狀實難支持刻下襄陽匪徒滋事又須派兵往剿僅能湊支十日之餉查粵東素稱饒富地方完



善合無仰懇

天恩飭下兩廣督臣葉名琛等於粵東省鹽釐關稅庫  
款中籌撥銀三四十萬兩分批馳解剋期來楚  
不特起北省目前飢餓之軍且於克復後迅速  
下勦不致停兵待餉並善後事宜均資利賴奏  
八

上命軍機大臣傳諭葉名琛曰武漢餉需竭蹶兵勇日

糧積欠甚多若不趕緊接濟必致軍心渙散惟官文等請撥三四十萬兩爲數過多各處軍餉均須粵東協濟恐一時無此鉅款著葉名琛迅籌銀十餘萬兩派委委員陸續解往毋稍遲誤

初八日 壬辰 福濟鄭魁士奏言巢縣逆匪恃衆負

嵎城外賊壘聯絡九月十六日裕溪口駛入賊船數百隻援賊萬餘 臣等派副將扎隆武等馳

往攔截行至東關青溪之間遇賊接仗殲斃多名我兵於姚廟岡放王岡一帶紮營遏賊來路二十三日南門大股賊匪四五百人直撲新營官軍分投迎勦擊斃賊目五名臣鄭魁士忽被礮子打傷肩脊仍復裹創力戰衆兵齊力衝殺斃賊一千餘名二十四日各門之賊夤夜出撲麟瑞等開放排槍斃賊無數二十八日扎隆武

等在放王岡紮營派隊分攻賊壘賊由夏家橋  
姚廟岡旗山三路共出馬步賊數千人直前馳  
驟諸軍嚴陣以待吉順馬隊從旁兜裏各兵勇  
盡力砍殺斃賊一千餘名賊勢大潰自辰至申  
鏖戰竟日大西門賊營亦經蕭開甲等填濠直  
進斃賊五六百人乘勢將城根二壘毀平分圍  
南門東門賊營五座我兵拋擲火器該逆驚竄

各軍一齊攻進奔潰之賊落濠死者不可勝計  
臣福濟督同吉順等攻小西門北門小東門臣  
鄭魁士督同麟瑞等攻大東門南門大西門並  
分兵暗襲姚廟岡石壘堵遏湖口湖中賊船連  
檣而下我軍先用漁船裝載火藥順風開放焚  
燒賊船幾徧賊衆驚駭我軍復連開大礮立沈  
多隻該逆紛紛落水屍平湖面礮械悉沈水中

逃賊登岸匿伏復經搜殺多名其時城賊見湖  
賊已敗仍踞各門死守我軍突放火箭延燒更  
棚數處適楚廣各勇已抵姚廟岡賊壘殲擒甚  
多該逆棄營逃竄衆勇追殺聲震山谷臣等見  
我軍得手親督諸軍各豎雲梯奮勇前進江忠  
信于昌麟余成蛟馬昇平等均已登城後隊繼  
進殺賊百餘名餘悉奔潰我軍追殺賊屍枕藉

東門之賊縱火衝出馬隊追勦斃賊極多遂於二十九日將巢縣城池克復其竄出之賊經麟瑞吉順扎隆武等分由南北兩岸追勦復殺斃數百名其倖逃者由黃落河岸分竄復經鄉團截殺殆盡統計數日之間奪獲賊營十三座礮臺十座賊卡二十餘處槍礮刀矛旗幟四千餘件斃賊七千餘名燒燬賊船一千餘隻生擒僞

將軍周擁和僞旅帥林壹分據供僞指揮黃逆  
在東門街口殺斃僞尙書林逆僞將軍蕭逆亦  
被焚燒訊明後卽將該逆梟示巢湖已無賊蹤  
統計廬州府屬合肥舒城廬江無爲巢縣各城  
均已次第肅清知縣邵啟元入城安撫臣等俟  
餉銀解到卽趕緊進兵南路各鎮將殺賊立功  
具有勞績副都統麟瑞擬請



旨交部從優議敘河州鎮總兵吉順南鎮總兵嵩瑞  
均擬請

賞加提督銜以示鼓勵其餘在事出力文武員弁兵勇  
客臣查明保奏陣亡藍翎守備銜徐榮請照守  
備陣亡例從優議卹奏入

上諭曰覽奏實深欣慰爾等躬冒鋒鏑鄭魁士復身受  
礮傷福濟督勦勤劬同廬注念更盼汝等乘勝進攻

以期一律廓清

上諭內閣曰賊踞巢縣聚糧固守經福濟等親督兵勇圍攻將士用命立克堅城廬州所屬合肥舒城廬江無爲等處均已次第肅清覽奏實深欣慰福濟鄭魁士均著交部從優議敘並發去御用駝色棉袍一件白玉喜字翎管一枝白玉搬指一箇大荷包一對小荷包四箇交福濟祗領御用藍色棉袍一件白玉喜

字翎管一枝白玉搬指一箇大荷包一對小荷包四箇交鄭魁士祇領鄭魁士躬冒鋒鏑身受毆傷猶復督兵力戰實屬奮勇可嘉著賞給如意拔毒散趕緊敷治副都統麟瑞著交部從優議敘河州鎮總兵吉順南賴鎮總兵嵩瑞均著賞加提督銜首先登城之江忠信于昌麟余成蛟馬昇平著與此次出力文武員弁兵勇分別保奏候朕施恩陣亡之守備銜徐榮

著照守備陣亡例從優議卹

福濟鄭魁士又奏言廬江甫經收復臣等屢飭  
地方官認真巡防頃聞桐城孫家畝小街有長  
髮賊首聚眾結盟在廬江大小礬山各處滋擾  
知會參將滕仲武派撥弁兵隨署廬江縣知縣  
何輝級督同練首李鼎新等直抵該處生擒僞  
將軍徐漢漳等二十三名陣斬數十名餘皆潰

散並擒獲僞大將軍段立剛一名解赴巢營據  
供與楊秀青洪秀泉洪大泉結爲死黨厯破城  
池實屬罪大惡極訊明後卽行正法奏入報

福濟又奏言巢縣自咸豐三年冬閒失守臣屢  
次勸諭紳民辦理團練現在大兵到境民間踴  
躍協勦幫築營壘實屬深明大義伏念該民人

等被賊蹂躪顛沛流離情殊可憫所有咸豐四  
五六三年錢糧懇

恩悉予豁免以示體恤奏入

上從之

十一日乙未秦定三奏言桐城援賊上自湖北安

慶潛太以及下游殘賊絡繹而來欲奪營盤扼

踞要隘乘勢分襲舒廬臣督飭兵勇於九月二

十三二十七等日疊次進剿斃匪多名二十九  
日賊匪突出萬餘分股來撲經梁勝章黃國亮  
等督率兵勇連開大礮斃賊四五百名臣又派  
鮑雲翥等帶兵接應後路酣戰一晝夜斃匪甚  
多三十日賊由東面山坡復來攻撲我軍槍礮  
齊施轟斃馬賊三名逆勢稍退是夜該逆仍以  
萬餘分圍我營卽於南沙岡潛紮賊營五座十

月初一日官軍分路進攻豫派右路兵勇埋伏  
誘敵臣率衆直衝賊隊刀矛繼進岳占先砍斃  
馬賊一名我兵盡力追殺屍橫徧野右路兵勇  
誘賊前進後面排槍齊發轟斃賊目數名初二  
日大股賊匪拌命來撲勢極兇猛兵勇噴筒火  
箭一齊施放擊斃二三百名逆衆驚亂奔逃我  
軍追殺數里統計生擒三十餘名斃賊三千餘



名內有僞檢點韋姓僞丞相藍姓僞將軍范姓  
僞指揮黃姓等均卽訊明梟示查臣營兵勇僅  
三千餘名連戰四晝夜子藥將盡糧餉俱虧乃  
能以寡勝衆大挫兇鋒所有出力文武員弁可  
否容臣擇尤保奏臣已飛咨福濟鄭魁士撥兵  
協剿尙未前來惟有竭盡血誠激勵將士乘機  
攻取奏入

上命軍機大臣傳諭福濟鄭魁士曰前因桐城兵單諭令福濟撥兵二千名或一千數百名前往助剿嗣復諭福濟派員前往桐城接辦剿匪事宜令秦定三馳赴蒙城尙未據福濟覆奏本日秦定三奏桐城大獲勝仗惟賊衆旣多勢尙兇悍急須添兵撥餉以圖克復未知福濟接奉前旨已派何路兵勇前往並派何員統帶儘一時無可靠之員卽暫留秦定三攻剿桐

城迅圖克復再行前赴蒙城著福濟秦定三妥商辦理不致顧此失彼爲要

上諭內閣曰逆匪久踞桐城經秦定三督兵往剿連戰四晝夜斃賊三千餘名生擒僞檢點韋姓等三十餘名此次將士用命竟能以少勝衆所有在事出力員弁兵勇著秦定三擇尤保奏

十二日

丙申

德興阿翁同書奏言瓜州逆匪自受

創後防守更嚴經臣等出示招降賊心渙散連  
日有皖楚老賊相率來歸臣等察其情詞尙屬  
真心特於三汊河毛三元營側別設一營派員  
約束俟足敷一隊卽令其隨剿俾得自新九月  
二十八日賊匪突出數百人我軍佯退至土橋  
一帶該逆跟蹤繼至經領隊富明阿等伏兵齊  
發斃賊四十餘名逆匪遁回瓜州連日又復堅

壁死拒臣等仍當離其黨與力擣賊巢並密約  
余萬清設法解散脅從奏入

上諭曰離其黨與固爲上策然須事事示以不疑密爲  
防範庶不致墮其計中瓜州與連鎮不同尤應慎益  
加慎

同日

上命軍機大臣傳諭官文胡林翼曰武漢逆賊負隅已

久據官文胡林翼奏報疊次擊敗大股賊援城賊勢已窮蹙是兩城計日可克乃南岸自八月初七日擊敗石逆以後兩月未見動靜北岸自八月二十七日擊敗下游援賊以後亦但以嚴遏外援爲詞何以於進攻機宜仍復漫無把握現聞金陵城內賊黨相殘楊逆被洪韋二逆所殺石逆不服逃出金陵洪逆懸賞購石逆首級是石逆之不返金陵已可概見此等

傳言湖北當有所聞若不乘此機會迅拔二城儻石  
逆不附金陵自圖占踞必至率其死黨或撲湖北或  
走江西皆屬可慮現在餉糈日缺調撥維艱所望克  
復上游卽可移師東下由九江而安慶而金陵乘其  
內亂次第削平兵餉可不加增而成功庶幾有望官  
文胡林翼身膺重任須當統籌大局何得以城堅賊  
悍爲詞坐擁重兵日久無功若云斷絕接濟可以困

賊何以爲時已久尙未成功恐沿江一帶港汊紛歧  
接濟仍未斷絕不過藉口耽延掩其遷延之咎經此  
次剴切申諭後該大臣等卽當嚴督將弁設法進攻  
迅將兩城克復俾得分兵東下大局冀有轉機如敢  
仍前延玩必致師老力疲別生變故官文等不能當  
此重咎也

十三日

丁酉

崇恩奏言臣查東省現存兵丁經派



撥防河及駐紮南路已逾二千餘名兵力尙形  
單薄仍須添兵協防兗州營兵均已派令防河  
此外各營存兵分計每處不過一二百名數十  
名不等若更於每汛酌抽勉強合爲一隊未必  
足資攻剿至青州滿營額兵一千四百餘名前  
調赴豫楚八百餘名存營僅六百餘名勢難再  
行抽撥合無仰懇

天恩准予免調俾資防守奏入

上諭曰覽奏尙係實情著准其留防本省

同日福濟鄭魁士奏言臣福濟督兵攻克巢縣  
後卽催總兵音德布進擣和州九月二十六日  
該逆千餘名前來攻撲音德布卽督飭參將惠  
成錫昌等分隊迎敵親率大隊奮力兜圍斃賊  
五六百名尾追十餘里二十七日進紮河村鋪

援賊大至惠成錫昌分帶各營攻賊左右兩路  
斃賊三四百名二十八日直抵和州城下滇兵  
奮勇進攻施放火箭立將西城樓焚燬本城難  
民齊心殺賊殲斃無算生擒三十一名餘賊開  
東門逃竄追勦至鍼魚嘴江口該逆擁擠落江  
死者不可勝計當將和州城池克復臣等已飭  
該知州葉錫藩入城安民惟西梁山芝麻河尙

有賊壘而江浦久踞未復在在俱防竊伺已令  
音德布在河村鋪一帶紮營與官渡香泉各軍  
聯絡聲勢實力巡防奏入

上諭曰被陷難民尙知齊心殺賊足徵人心向順大有  
轉機亟宜乘勢激勵俾人自爲戰迅期蕩平

福濟又奏言巢城克復後臣本可親赴臨淮因  
安慶桐城潛山太湖各紳民來營堅請前往逆

首石達開現在安桐臣不得不親督諸軍馳剿  
秦定三攻勦桐城兵力甚單九月二十九日賊  
衆萬餘攻撲營壘臣已派吉林熱河馬步隊二  
千餘名又飛飭參將滕仲武帶陝甘兵五百名  
星夜馳往俟兵勇趕到將圍營賊匪擊退卽遵  
諭令該提督前赴蒙城現在西梁山一帶尙有賊壘當  
令吉順音德布及地方官堵剿京口協副將李

德麟已將神塘河賊營踏毀惟該副將祇有紅單快蟹船十四隻上下游不能兼顧總兵吳全美有紅單船四十餘隻聚泊蕪湖上游之魯港地方兵力較厚前已奏請准臣調度如蒙

俞允水陸夾攻實於江北軍情大有裨益奏入

上命軍機大臣傳諭和春德興阿福濟鄭魁士曰巢縣克復後我兵乘勝攻拔和州勦辦已有轉機惟西梁

山一帶尙有賊壘業派吉順等在彼堵剿神塘河賊營雖經李德麟踏毀而該副將所帶僅有紅單快蟹船十四隻上下游不能兼顧總兵吳全美紅單船四十餘隻現泊蕪湖上游魯港地方此時福濟等陸路進剿得力急應水陸兼攻江北肅清則江南易於剿洗著和春德興阿卽飭該總兵紅單船聽候福濟等調遣該撫探知石達開現在安桐一帶金陵賊黨內

亂該逆自不能復返金陵急當乘其衆心渙散之時  
督飭兵勇一鼓殲擒如能滅此巨憝則沿江地面  
可漸次掃蕩儻仍任其他竄則彼既不附洪逆必致  
自圖占踞聞江西瑞臨等郡該逆皆派其黨與死守  
若使竄往江西鷓張更甚福濟等務當盡心堵剿勿  
令鋌而走險又聞該逆本有投誠之意恐非確信此  
輩狼子野心斷難輕議招撫惟當密布閒諜偵探實



情多方設法散其黨與仍不動聲色督兵進剿福濟等前請調山東青兗官兵該省存兵無多不能分撥福濟等惟當就現有兵勇激勵圖功由桐城而安慶迅掃鯨鯢然後協同和春等規復江南同膺懋賞

上諭內閣曰官兵自攻克巢縣後進攻和州連獲勝仗克復州城辦理尙爲得手著卽迅速進兵盡殄羣醜毋留餘孽甘肅肅州鎮總兵音德布奮力進剿調度

有方著賞加提督銜其餘在事出力員弁官紳兵勇著福濟等查明保奏候朕施恩

福濟又奏言查皖省被賊竄擾以來先後奉

旨派令呂賢基張芾籌辦團練其時在籍紳士李鴻章

黃先瑜張錫榮程葆李元華等皆能認真訓練

堵剿兼籌各屬亦隨同辦理協防助剿如滁泗徽甯鳳穎等處均各著有成效所有歷次出力

各官紳經臣先後奏請獎勵現復飭屬一體遵行責成該管知府直隸州督辦所有江以南之徽甯池太廣五府州卽歸徽甯道統理稽查仍聽張芾就近調度江以北之安廬六淞和五府州鳳潁泗三府州則歸臬司及廬鳳道分統稽查由臣調度其司道及知府直隸州應請

旨加以督辦協理等銜如能力保地方仍分別隨時酌

保請予升轉若州縣因團練防勦保至知府同知直隸州者各留本任以資熟手並加協理團練銜用示優異該司道現皆帶有兵勇毋庸另撥半年之中專委知府同通等員巡視一次辦團各紳由糧臺酌予鹽折銀兩毋庸議給廉俸其偏近賊氛之府州縣免辦一應捐輸雜派如有情殷報效者應從其便統計捐數或加學額

或給獎敘俟軍務告竣分別辦理其留防派防  
兵勇口糧應於附近完善地方畝捐釐捐酌予  
撥給如團丁有行兇搶掠及偷漏火藥等弊應  
飭各管帶員弁嚴密稽查儻有失察立予嚴叅  
再團練本於保甲應飭各屬一律遵行奏入

上諭內閣曰福濟奏遵擬團練章程均著照所議辦理  
安徽現當剿辦喫緊團練尤爲要務該撫當慎選賢

能督率公正紳士實力舉行其各屬編查保甲仍飭一律遵辦毋得日久生懈有名無實

福濟又奏言安徽舒城和州廬江無爲州等處先後攻克雖官兵血戰之功而該處民人等或辦理鄉團或嚴拏奸細皆能斷賊接應助我聲威至無爲州賊勢蔓延臣札派知府李元華募勇勦辦因糧臺支絀勸諭該州境籌備勇糧以

資攻勦竟能於蹂躪之後竭力輸將毫無貽誤  
合無仰懇

恩施請將舒城和州廬江無爲州咸豐四五六三年錢  
糧悉予豁免並永遠增廣廬江無爲州文武學  
額各三名以示優獎奏入

上諭內閣曰安徽舒城等州縣久爲逆賊竄擾現經官  
軍先後攻克該州縣民人或辦理鄉團斷賊接應或

捐糧募勇協助聲威均能踴躍同仇亟應渥沛恩施  
以示嘉獎所有舒城縣和州廬江縣無爲州咸豐四  
五六三年錢糧著概行豁免廬江縣無爲州並著永  
遠增廣文武學額各三名以示優獎



欽定剿平粵匪方略卷一百六十四 丙辰年

十月十五日 己亥 胡林翼奏言鄂城自石逆大股

敗逃後我兵連日環攻賊復嬰城死守現在仍  
築長圍斷其接濟但賊情已見飢疲而官軍亦  
形匱乏計楚省南北兩營每月口糧及製造軍  
火約需銀二十八萬兩而鹽課釐金等款僅敷  
十分之二各省協餉山陝雖月有所解數僅三

萬川省所解覈以兩月三萬尙難如期窘迫情  
形更難罄述查各省餉路以四川爲最便伏求  
飭下四川督臣特指專款撥解楚省二十萬兩稍補本  
年欠餉奏入

上命軍機大臣傳諭樂斌曰楚省南北兩營月需餉銀  
二十餘萬兩該省鹽課釐金等款僅敷十分之二此  
時楚省官軍攻城築圍斷賊接濟將士極爲用力正



衆出救楊載福復令陳金鼈王明山二營登岸  
誘敵令周清元丁泗濱二營從下游乘虛入城  
前後夾攻城外之賊大亂殲斃五六百名踏平  
賊壘三座直抵田鎮焚奪賊船八十三隻奪獲  
礮船四隻大小礮位二十尊其咸甯之賊竄馬  
橋柏墩等處經署知縣黃鐘鳴督勇擊退八月  
二十五日僞尙書魯逆領衆三千餘人併力來

犯至通山交界之小嶺黃鐘鳴督勇集團迎勦  
斃賊二百餘名生擒八十五名九月十五日賊  
繞道崇陽返竄丁泗橋黃鐘鳴率領把總唐明  
周德麟等星夜往勦斃賊二百餘名賊衆敗退  
黃鐘鳴收隊亟歸籌備守具賊偵知兵少卽日  
直薄城下賊衆二千餘人分踞城外山巔輪流  
撲城圍攻三晝夜城上槍礮齊發擊斃馬賊數

十人賊於十八日宵遁城圍立解黃鐘鳴率勇  
尾追各團聞信四面兜截於黃石洞望谷坳蘇  
家嶺馬橋等處又擒斬數百名奪獲旗幟刀矛  
多件逃去賊匪僅三四百人均往興國竄逸此  
次水師轉戰無前黃鐘鳴出奇制勝所有最爲  
出力暨陣亡員弁可否仰懇

天恩給予獎卹奏入

上諭內閣曰九江安慶賊船上竄蘄州經楊載福等追  
剿焚燬賊船蘄州城賊出救我兵乘虛入城踏平賊  
壘直抵田鎮焚奪賊船八十餘隻咸甯之賊竄馬橋  
柏墩撲犯通山交界之小嶺黃鐘鳴等督勇迎剿賊  
敗後偵知城內兵少復薄城下圍攻三晝夜賊始宵  
遁城圍立解雲夢縣典史代辦咸甯縣知縣黃鐘鳴  
殺賊守城奮勇出力著開缺以知縣留於湖北儘先

補用監生黃守信著以從九品留於湖北遇缺卽補  
並均賞戴藍翎把總唐明著以千總留於湖北儘先  
補用並賞加守備銜訓導蕭道鶴著賞加五品銜軍  
功鎮竟成等均著以外委留於湖北儘先補用並賞  
戴藍翎附生梅鳳藻著以訓導選用監生丹必達著  
以未入流選用附生盧定箴監生陳春藻童生鄭遠  
安均著以從九品儘先選用從九品銜鄭德熊著賞



加六品銜陣亡把總周德麟著照例從優議卹軍功  
彭宏章著照外委例從優議卹

二十日甲辰何桂清奏言江西逆匪自廣信受創

後有僞東王楊逆之姪楊國宗率黨竄踞德興  
縣城八月二十五日該逆大股由德興竄婺源  
之高砂地方直逼縣城該城文武分路迎剿寡  
不敵衆縣城失陷二十六日該逆結連各路匪

徒四五千分股竄踞休甯縣城張芾派撥兵  
勇親自督陣自九月初三至初七等日斃賊千  
餘名十二日賊以大股撲營周天受帶川兵奮  
勇擊退賊匪死傷甚多十四日賊由萬安街潛  
埧來撲江長貴帶兵率同民團併力夾擊斃賊  
數十名生擒十二名賊仍四出焚掠休歙兩縣  
鄉團羣起殺賊擒斬百數十人張芾於十八日

聞計丁母憂仍出示徧諭軍民兵勇墨經從戎  
誓滅此賊二十二日賊出大隊窺沾露嶺周天  
受等陣斬黃衣賊目三名執旗悍賊七名殲斃  
二百餘名二十六日賊以大股分撲各營江長  
貴等奮力夾擊守備羅承勳手燃大礮立將賊  
首楊國宗轟斃賊衆大潰我軍追擊數里斃賊  
千餘名該逆盡焚其巢併踞城中張芾親督兵

勇踴躍登城斃賊無數遂於十月初四日將休甯縣城克復派員安撫居民仍飭江長貴等分路追勦竄匪此次陣亡之甯波城守營守備徐勇把總張學寬外委張國才相應仰懇

聖恩飭部從優議卹奏入

上諭內閣曰徽郡官軍克復休甯縣城此次張芾督兵攻勦將士用命各路民團齊心殺賊辦理頗屬認真

著何桂清仍飭在事文武迅速勦捕肅清徽境再將出力人員彙案保奏陣亡之甯波城守營守備徐勇把總張學寬外委張國才均著交部從優議卹

何桂清又奏言甯國逆匪於九月初九日分股撲營鄧紹良親督官兵迎勦守備陳再受槍斃黃衣賊目旋中礮陣亡我兵奮勇衝殺連斃賊目三名殺斃賊匪二百餘名逆衆潰竄回巢負

不出我軍進逼城濠連日架礮轟擊城中屋  
瓦皆飛其水陽新河莊一帶經知府仲孫懋遊  
擊蔣錫光連營扼堵建平兵力稍單臬司慶廉  
派守備黃熊飛帶勇前往交秦如虎調遣其涇  
縣甯國各處亦經鄧紹良調兵填紮似此力籌  
堵剿庶逆援盡絕賊勢愈窮陣亡守備陳再受  
仰懇

天恩飭部照遊擊例議卹奏入

上諭內閣曰甯國賊匪分撲官軍營盤經鄧紹良督兵  
迎剿賊衆潰逃湖南儘先都司陳再受中礮陣亡殊  
堪憫惻著交部照遊擊例議卹

何桂清又奏言前任江西巡撫張芾在徽郡軍  
營接到家信知本生母王氏於九月十五日在  
紹興府寓次病故時值休甯軍情喫緊該員墨

經從戎復手諭兵民齊心殺賊現在休城克復  
該員咨請代奏暫行

賞假六箇月赴浙扶柩回籍安葬俟假滿再行來浙聽  
候差遣並據徽郡紳耆以該郡東接甯國北連  
池州西界廣饒三面受敵張芾督辦多年布置  
周妥爲東南全局所關必應一手經理仍請奏  
明留徽督辦各等情可否仰懇



天恩俯准張芾所請暫行給假六箇月赴浙扶柩回籍  
安葬再赴徽郡督辦軍務之處伏候

訓示遵行奏入

上命軍機大臣傳諭何桂清曰張芾現在軍營丁憂徽  
境毗連甯國池州廣饒等處軍情正當喫緊該處防  
務如有可以接替張芾者卽著何桂清一面奏明派  
往一面傳旨賞給張芾六箇月假期令其回籍營葬

如一時無人可以接替卽傳諭張芾暫留徽郡督辦防剿俟接手有人卽行回籍

諭內閣曰張芾辦理徽州一帶防剿事宜甚爲出力此次督兵克復休甯尤屬調度有方該員現丁母憂著俟服闋後以三品京堂補用

何桂清又奏言饒廷選一軍先經廉兆綸咨請暫時留防廣信嗣准曾國藩文俊咨會已飭同

知吳坤修帶彪勇二千五百名前來接替至今  
月餘尙未見到饒廷選仍未能回駐玉山前經  
督臣調回建甯防兵五百名本歸饒廷選統帶  
此時亦尙未起程現在撫州官軍失利自貴溪  
弋陽以至廣信一路空虛儘再有疏虞關繫匪  
淺應請

飭下曾國藩文俊速飭吳坤修迅赴廣信防守以重地

方奏八

上命軍機大臣傳諭曾國藩文俊曰曾國藩等自八月間奏報瑞州等處勝仗後已及月餘未見續報本日何桂清奏撫州官軍失利亦未見曾國藩等入奏賊匪多回金陵而江西失陷各郡尙無一處克復所有占踞城池之賊聞皆石逆黨與誘脅土匪爲之拒守卽廣東新附匪徒亦皆係石逆所糾集與金陵逆黨

尙未歸併據江浙各省奏報皆言金陵內亂石逆斷  
不再返金陵現在安慶桐城一帶糾合黨與其爲自  
圖占踞已可概見福濟等已攻克巢縣和州不日卽  
可進擣安桐而湖北沙口田鎮水陸兵勇屢絕賊援  
恐石逆不得逞志於皖楚勢必竄入江西其勢愈難  
收拾著曾國藩等乘此賊心渙散之時趕緊克復數  
城使該逆退無所歸自不難窮蹙就擒若徒事遷延

勞師糜餉日久無功朕卽不遽加該侍郎等以貽誤之罪該侍郎等何顏對江西士民耶又聞石達開頗有投誠之意雖非確信而窮蹙思降亦或事之所有此輩狼子野心原難輕議招撫儻或真心乞降應如何處置或使立功贖罪亦當豫爲籌畫經權互用以收實效吳坤修所帶彪勇二千五百名何以日久未到廣信著曾國藩等查明飭令迅速馳往以便饒廷

選回駐玉山

二十一日乙巳怡良趙德轍奏言留署六合縣事

知府溫紹原奉

旨以道員留蘇補用專辦六合防堵事宜查道員職分較崇未便仍行留署縣事本任六合縣知縣李守誠自幫辦縣事以來於地方情形及團練紳董均已熟習應卽飭令到任以專責成現在署

江甯府知府存葆因病請假應飭溫紹原攝理  
江甯府事仍留六合督同李守誠辦理防剿事  
宜奏入

上諭內閣曰江蘇留署六合縣事補用道員溫紹原准  
其署理江甯府知府毋庸留署六合縣事仍著辦理  
該縣防剿事務其江甯府所屬團練事宜一併責成  
溫紹原督辦



二十三日丁未秦定三奏言桐城援賊欲由樅陽

進踞呂亭圖竄舒廬十月初五日臣派兵先伏

呂亭街後親督兵勇跟追該逆鏖擁北驅將近

呂亭伏兵齊起轟斃騎馬賊目數名初六日兵

勇分路進攻槍斃逆匪多名賊勢披靡兵勇乘

虛直擣拋擲火器連燬賊營三座斃匪無算初

七至初九等日該逆屢山大股圍撲營盤疊經

官軍截殺撫臣福濟已派參將蕭開甲等率衆來援初十日賊匪繞道潛撲三十里鋪臣卽帶兵勇進攻立毀賊營五座該逆回救亦經我軍擊殺多名十四日賊復出大股抄圍我營臣派兵勇扼據西山勢如建瓴矢石交攻斃賊不少餘賊紛逃我兵追殺三四里轟擊徹夜統計生擒三十八名殺賊一千餘名臣已飛調協領富

山馬隊來營會勦滕仲武所帶陝甘兵五百名  
派令與蕭開甲等同紮三十里鋪該逆屢次撲  
竄緣有李兆受等黨與在內意圖勾結張落刑  
以死守桐城爲保護安慶之計現飭六安舒城  
霍山等州縣嚴密防堵惟桐城久遭蹂躪米糧  
子藥一切俱無據鄭魁士函稱派川楚勇一千  
餘名次第來桐若得迅速接濟士氣尙可振作

惟  
有  
仰  
懇

天恩飭令福濟鄭魁士星夜來桐會剿並撥糧米子藥  
前來接濟庶賊氛可期迅掃奏入

命軍機大臣傳諭福濟鄭魁士曰秦定三連日打仗  
獲勝勦辦尙爲得手惟我軍米糧子藥用盡急須寬  
爲籌備一俟各兵到齊即可乘勝進擣賊巢賊黨內  
有李兆受等夥匪意圖勾結張落刑以死守桐城爲

保護安慶之計石逆素稱兇悍今復加以捻黨勢更猖獗必須先克桐城方能進圖安慶著福濟鄭魁士迅籌米糧火藥以資接濟

二十四日戊申和春奏言逆匪占踞句容溧水相

爲犄角必須先拔二城方能直抵江甯臣到丹陽後分派官兵進剿十月初一日逆匪千餘人於南門外淤鄉焚擄張國樑會同明安泰督兵

分路進剿三面夾擊斃賊二三百名初四至初  
十等日連次進攻斃賊百餘人暨數十人不等  
十二日官兵分路攻城東南北三門各出賊千  
餘人來撲我兵奮力轟擊賊衆拌死抗拒兵勇  
會合夾攻砍倒執旗馬賊四名殺斃三百餘名  
餘賊奔潰傅振邦虎嵩林等於十月初一日分  
攻溧水縣城賊匪堅匿不出我軍佯爲收隊分

途潛伏適西門賊匪大股出撲兵勇回戰伏兵  
齊起立斬黃衣賊目二名各隊左右抄擊礮斃  
無數賊衆大潰兵勇追至城下斃賊二百餘名  
連日進剿疊有斬獲余萬清等十月初六日進  
攻鎮江府城分路埋伏該匪大股出拒我軍奮  
力合擊把總傅定邦外委何庭貴鄭國泰首先  
衝入賊隊手刃黃衣賊目數人副都統巴棟阿

等兵勇分投迎擊共斃賊四百餘名現已分飭  
各軍趕緊攻勦迅圖克復查參將李鴻勳千總  
李逢春外委劉可發臨敵捐軀深堪憫惜相應  
請

旨飭部從優議卹奏入

上諭內閣曰和春現已馳赴句容親督攻勦著與張國  
樑督飭各軍乘勝迅復各城以圖進取所有參將李



鴻勳千總李逢春外委劉可發殺賊陣亡均堪憫惻  
著交部從優議卹

二十五日己酉福濟鄭魁士奏言據秦定三函稱

桐賊復來攻撲勢甚危急當派遊擊江忠信帶  
勇前往臣鄭魁士與麟瑞復於十六日帶兵馳  
援不日可到至東關爲全巢門戶亟須精兵扼  
守查有河州鎮總兵吉順綏靖鎮總兵扎隆武

聞

戰守兼優已飭帶兵勇三千餘名駐關鎮守星  
羅碁布後路直接巢城臣福濟一俟餉銀解到  
卽親赴桐城督勦奏入報

福濟又奏言粵捻皆當實力攻勦不可專顧一  
隅前已奏請明降

諭旨派秦定三赴蒙督辦疊次撥往桐城兵勇並鄭魁

士麟瑞帶去各隊不下五千餘人足敷勦辦第  
秦定三前在舒廬一帶於桐城軍務尤爲熟悉  
前奉

旨桐城已將次攻克卽著暫留攻勦該提督亦願暫留  
該處早下堅城臣俟到桐後酌量情形或秦定  
三鄭魁士合兵一處或分攻潛太或暗擣懷甯  
隨時妥商辦理至蒙城宿州雖令郝光甲珠克

登等分投堵禦日久恐其貽誤非得曾經行陣  
大員斷難勝任秦定三旣難卽去臣思伊犁領  
隊大臣勝保前奉

旨來京當差計日當已趕到該員聲威素壯如蒙  
飭令赴蒙督辦必能速殲狂寇不任蔓延而替出秦定  
三俾由南路進攻良多裨益奏八

上命軍機大臣傳諭福濟鄭魁士秦定三曰鄭魁士已

抵桐城福濟不日亦前往會勦是皖南軍務已接辦  
有人而蒙宿等處帶兵各員甚不得力非秦定三親  
往督率不能望其振作自應迅速移營北向以資攻  
勦秦定三著仍遵前旨馳赴蒙城毋庸再留桐城至  
勝保奉旨來京應否派往軍營朕心自有斟酌現在  
該員尚未到京豈能以刻不容緩之軍情久懸以待  
勝保之至耶

同日秦定三奏言桐城逆匪疊經官軍勦敗後復敢於西面山谷潛築營壘九月十六日官兵分路夾攻立將賊營燒燬賊衆紛竄復經接應兵勇要路截殺斃匪甚多該逆正於東南山坡築營架礮轟擊我營臣督率兵勇奮力進攻外委解成珠首先砍殺賊匪二名適中礮陣亡兵勇越牆而進砍斃逆匪多名立將賊壘三座平

毀十七日探知城內賊匪運送米糧子藥前來  
臣卽派兵勇馳往攔截該逆以大股擁護我軍  
排槍齊放轟斃多名逆衆驚逃奪獲米糧三十  
餘車子藥器械多件賊衆分股來撲我兵盡力  
衝殺轟斃黃衣賊目一名餘賊敗逃復追殺百  
餘名是夜我兵分四路攻勦先將後路賊營焚  
燒賊衆驚潰兵勇一齊砍殺斃賊無算立將賊

營一十六座同時燒燬統計兩日斃賊二千餘  
名生擒二十六名鎮臣鄭魁士已於十六日由  
巢縣起程一俟到桐兵力又增當可力克堅城  
節節進攻外委解成珠殺賊捐軀情殊可憫應  
請

旨飭部議卹奏八

上諭內閣曰此次官軍連日疊獲大勝將士用命甚屬



可嘉著卽乘勢迅克桐城直搗安慶以期掃盡逆氛  
外委解成珠中嚴陣亡著交部照例議卹

二十六日

庚戌

略秉章奏言湖南南界兩廣北界

湖北西界四川貴州東界江西各省賊匪蔓延  
湖南邊界防兵萬難遽撤自咸豐三年至今四  
載除勦辦本省賊匪外湖北廣西廣東貴州江  
西各省賊匪竄入湖南但有湖南兵勇出境應

援各省從無跟蹤追剿計軍興以來湖南辦理  
軍需防堵用過銀一百九十餘萬兩錢九十七  
萬一千餘串防剿五省分援兩省又撥解湖北  
江西兩省餉需爲時旣久庫款已空現在積欠  
各營口糧計已四十餘萬兩無從設措上年奏  
撥四川省銀十二萬兩僅據解到銀二萬兩合  
無仰懇

天恩飭下四川督臣將未解銀十萬兩迅速委解此外  
不敷甚鉅並懇

飭下戶部查明有著之款量爲籌撥奏入

上命軍機大臣傳諭葉名琛樂斌曰湖南官兵積欠口  
糧四十餘萬軍士枕戈待哺自應先其所急以濟要  
需著樂斌將前撥湖南餉銀十萬兩仍如數湊撥速  
行解往該省欠餉過鉅恐此款不敷分派並著葉名

探迅速籌銀十萬兩解赴湖南

二十七日 辛亥 德興阿翁同書奏言江浦賊情因

金陵內訌衆心慌亂 臣等派舒通額等帶隊馳

往會攻十月十六日齊至江浦城下西南兩門

各出賊四五百人我兵併力進攻斃賊二百餘

名奪獲旗幟槍械多件餘賊敗竄回城堅閉不

出其九洑洲接應之賊悉爲兵勇擊退觀音門

浦口等處賊船亦經陳世忠葉常春焚燬多隻  
臣等仍囑加意嚴防一俟輪船入江先攻金山  
瓜州再行會合水師節節剿洗惟此項輪船迄  
無起碇消息現已分咨怡良趙德轍何桂清促  
令星速來江俾資剿辦臣德興阿已於本月十  
八日由儀徵至土橋陳國泰水營相度情形豫  
籌安置奏入報

聞

二十八日壬子福濟鄭魁士奏言桐城賊匪經臣

福濟等派撥馬步各隊會合秦定三進剿十月  
十六日臣等親督官兵由巢縣前進內外夾攻  
該匪經秦定三連攻十餘晝夜業已膽落鄭魁  
士到營後復派兵於山岡左右埋伏該逆大股  
遽擁前來遊擊余成蛟直衝賊隊立斬黃衣悍

賊數名伏兵齊進槍礮環擊斃賊甚多該逆復聚萬餘人分股來撲協領桂成等合力夾攻賊衆紛紛敗潰副都統麟瑞復帶馬隊盡力衝殺賊屍徧野鄭魁士督飭將備乘勢進圍東門遊擊江忠信越進重濠首先衝殺斃賊數名適中礮陣亡各兵勇奮力攻擊秦定三督同鮑雲翥等進攻北門燒燬城上更樓二座槍斃守垛悍

賊無數統計連日斃賊四五百名生擒十一名  
該逆敗竄回城復調集江楚各路援賊死守抗  
拒臣等惟有步步爲營分紮城根要隘以期迅  
速攻克卽補參將湖南長安營遊擊江忠信臨  
陣捐軀殊堪憫惻合無仰懇

恩施從優

賜卹奏入



上諭內閣曰安徽桐城匪徒經福濟等派馬步各隊與  
秦定三會同攻擊斃賊多名著福濟鄭魁士督飭將  
弁乘勝攻克毋任遷延卽補參將湖南長安營遊擊  
江忠信身經百戰屢受重傷茲以奮勇爭先中礮陣  
亡深堪憫惜著交部照副將陣亡例從優議卹

同日何桂清奏言徽郡官軍克復休甯後餘匪  
分股竄踞黟縣及漁亭等處九月初五日江長

貴督隊進攻漁亭賊匪敗遁我軍追至桃源洞  
擒斬多名初六日周天受進攻黔縣直逼東門  
逆匪紛向北門竄逸時江長貴派都司王夢麟  
等前來助勦遂分隊由東西南三門一鼓而進  
收復黔城餘匪直趨羊棧嶺另股由西武嶺竄  
祁門北鄉初七日江長貴周天受等追勦至太  
平縣境之郭村沿途擒斬多名徽郡全境肅清

其甯國賊匪經鄧紹良督兵於南城望牛墩紮營五座三十日該逆以二千餘人由西門衝出鄧紹良親督侍衛胡鳳鳴等分路迎擊陣斬多名逆衆奔潰十月初一日東南兩城同時竄出賊匪四千餘人直撲我軍營壘遊擊葉鳳高把總冉正祥等分投迎剿斃賊數百名賊衆敗竄初二日鄧紹良復派兵乘夜燒燬賊巢初三至

初六等日連次進攻將出城抗拒之賊殲斃無數現據探報石逆糾黨一萬餘人由池州青陽竄集南陵欲圖分竄涇太青弋江等處上游賊援聚於蕪湖是甯國與涇太兩縣堵剿均關喫緊涇太防兵業經鄧紹良張芾豫爲布置臣復飭皖南道會同防剿至甯國軍營已調仲孫懋一軍相機圍攻一切尙臻周密所有從九品方

正劉德明千總程元寶把總馮清標外委徐岳  
林劉洪高胡鴻飛在婺源休甯歙縣先後陣亡  
相應奏請

飭部從優議卹奏入

上諭內閣曰徽州官軍克復休甯後餘匪分竄黟縣及  
漁亭等處經提督鄧紹良等連日進攻斃賊數百名  
著該提督迅速克復城池毋任蔓延所有徽郡勦匪

陣亡之儘先從九品方正劉德明千總程元寶把總  
馮清標外委徐岳林劉洪高胡鴻飛均著交部從優  
議卹在事出力人員著何桂清與前次克復太平祁  
門案內各員一併查明保奏

二十九日 癸丑 福興奏 謹 臣奉

旨馳赴江西會同曾國藩文俊辦理軍務當經和春於  
江南大營內籌撥副將張騰蛟所帶兵六百名

營總巴呢泰圖克唐阿所帶兵四百名並西安  
馬隊一併交臣帶往臣遵將江甯將軍印信於  
十六日交和春祗領卽於二十日起程取道蘇  
杭徑由常玉山行走俟入境後當與曾國藩文  
俊和衷商辦以冀早殲醜類奏入

上諭曰汝抵江右一切機宜務須奮發有爲以期次第  
克復若稍有畏難之見朕必治汝之罪

同日

上諭內閣曰各省府州縣官均有守土之責遇有賊匪  
竄擾嬰城固守克保城池朕不惜破格施恩以昭激  
勸其失守各員有能於事後奮勇殺賊力贖前愆者  
或准其免罪留營效力原屬法外之仁豈容視爲常  
例近來各路統兵大臣及各省督撫往往於失守員  
弁勤以功過相抵爲詞不但寬其罪名甚至仍留原



任且有失守之時並不奏參直至克復後徑請免議者似此曲爲開脫何以持刑法之平著通諭各路統兵大臣督撫所有失守後隨同克復各員祇准酌減罪名或從寬免罪仍帶降革處分不准遽請開復俟續有勞績方准酌量保奏以杜冒濫而示勸懲